



• Фотофакт

## «Шкемын илышем, пашам литературылан пөлеклем...»



(Тўналтышыже 31-ше №-ште)

1942 ийыште Новороссийск ола верч тале кредалмаш каен шоген. Тушман ик салтакымат, нимогай техникымат ойырен да нангаен ынже керт манын, 10 сентябрьыште 30, 349, 353 стрелковый дивизий-влак Лысая Гора, Бабаков щель, хутор Попандопуло воктене кўкшака-влакым налашлан атакыш кыне-лыт. Нунылан артиллерий-влак сай польшышым пуэныт. Нунын коклаште – Миклай Очетов.

Эн ончыч тудын служитлыме полк Горячий Ключ, Ключевая воктене погынышо пехотым да обозым шалатымаште участвоватла, вара Калужские нефтепромысловый районшто минбатарейым пытара, Горячий Ключ воктенысе кўвар воктене тушманын пехотыжым да обозым шалатен колта.

19 август гыч 25 сентябрь марте артиллерист Очетов Безымянная – Крепостная – Дербентская линий воктене (Новороссийск ола деч 50 менте эрвелыште) оборонным пентыдын кучен. Кредалмаште пентыдылыкым, лўддымылыкым ончыктен. Тудын 122 мм пушкыжо ятыр фашистым пытарен.

1942 ий 25 сентябрь гыч 20 декабрь марте Туапсинский оборонительный операций эрта. Тудым кок ужашлан шелаш лиеш: икымше этап 25 сентябрь гыч 23 октябрь марте шуйна, да фашист-влак «Атика» операцийым илышыш пурташ тыршен наступленийым эртарат да Шем тенгызыш Туапсе ола воктене лекташ тыршат. Нуно лач Пшиш энер воктеке лектын кертеныт. 2 этап 23 октябрь гыч 20 декабрь 1942 ий марте эрта да тиде жапыште 18 армийын контраступленийыже эрта, а фашист-влак шке наступленийыштым Семашхо курык воктечын Георгиевское село велыш нангаеныт.

Артиллерий ден миномет-влак кок кече талын лўйкаленыт, ятыр немгы самолет-влак бомбым кышкеныт, пулемёт дене лўйкалыме деч вара Туапсе олам налашлан 17 немгы армий кугу наступленийым тўналеш.

23 сентябрьыште артиллерий ден миномет-влакын талын лўйкалымышт деч вара, тушман наступленийым тўналын. Виян кредалмаш деч вара фашист-влак оборонным шалатен кертын огытыл да чакненыт.

25 сентябрьыште тушман угыш шке кугу наступленийым тўналеш. Эн тўн, вўран кредалмаш-влак 18 армийын оборонышто шогышо фронтын покшел участкыштыже каеныт.

Закавказский фронтын шолла могырыштыжо 56 армий кредалын. Тушман сентябрь мучаште Безымянное, Фанагорийское села-влакым налын да фронтым 8 менте келгытыш пурен, но умбакыже каен кертын огыл. Фашист-влак Псекупс энерын кўшыл ужашыжым налын, 18-ше армийын шентекше лекташ поненыт. Морьяк-влакын 76 стрелковый бригадыже оборонышто пентыдын шоген да ик метрланат шентек чакнен огыл. 395 стрелковый дивизий Качканова хребет воктенысе кўкшака-влакыште сайын кредалын, а 30 стрелковый дивизий Хребтовой перевалыш тушманлан корным петырен.

14 октябрьыште фашист-влак угыч наступленийыш каят да иканаште кок вере атакым тўналыт: эрвел гыч Шаумян селаш да Фанагорийское селан эрвел гыч Садовое районышко.

56 армий ден 18 армий коклаште фашист-влак оборонным шалатеныт да 16-17 октябрьыште Кочканов курыкым налыныт. 23 октябрьыште тушманым шогалтеныт да 24 октябрьыште контраступлений деч вара Кочканов курык ўмбалам йошкар флагыш шогалтеныт.

Фашист-влак ноябрь покшелне эше ик наступленийым тўналыт. Георгиевский гыч Туапсе олашке лекташ понат. 20 ноябрьыште Гойтх села воктене немгы армийын ик ужашыжым кырен шалатат. 26 ноябрьыште 18 армий наступленийым тўналеш да 20 декабрьлан тушманым Пшиш энер вес велыш поккен колта. 25 декабрьлан фашист-влакын Семашховский группыжым шалатат.

25 сентябрь гыч 31 декабрь 1942 ийыште Миклай Очетов Туапсе ола верч талын кредалын. Фашист-влакын икмыняр наступленийым да ятыр атакыжым чактарен, тушманын пентыде оборонным шалатен, контраступленийыште участвоватлен да Кавказ верч илаш-колаш кредалын. Тудын 1195 гаубичный артиллерийский полкшо Кавказым оролымаште кугу надырым пыштен.

25 сентябрь гыч 6 октябрь марте фашист-влак Пятигорское, Ахтырский участкыште Волчы Ворота, Лысая Гора воктене икмыняр кўкшака ден села-влакым налын, наступленийым кечывалвелыш, кечывалвел-касвелыш нангаеныт. Тале кредалмаш Фонарь курык да 192,0 кўкшака верч каен шоген. 3 октябрьыште 1195 гаубичный артиллерийский полкын батареиже тушманым Фонарь курыкыш-

то, Фанагорийское селаште, 192,0 кўкшакаште атакыжым чактарен да артбатарейым да взвод наре пехотыжым шалатен.

Октябрь тылзыште 1195 гап фашист-влакын ятыр контратакыштым шогалташ полшен. 7-14 октябрьыште фашист-влак Фанагорийский ден Хатыпский воктене оборонышто шогеныт да резервым вученыт. Тиде жапыште 56 армийын дивизийже-влак Фонарь курыкышто, Старообрядческий хутор, Курганная щель воктене икмыняр гана атакыш кыненыт. Южо кўкшакаже кид гыч кидыш икмыняр гана куснен. Артиллерист-влак тушман ўмбаке «тулым» кышкеныт да тушманлан корным петыреныт.

7 октябрьыште Безымянный хутор воктене 1195 гап тушманын артбатарейым шалатен. 8 октябрьыште Фонарь курыкышто 2 минометный батареиым пытарен.

12 октябрьыште Фанагорийский воктене минбатарейым пышландарен да 326,4 кўкшака, Волчы Ворота воктене тушманын атакыжым шогалтен, взвод наре пехотым вес тўняшке колтен. 13 октябрьыште Старообрядческий воктене артбатарейым да пасушто боеприпас складым пудештарен.

Фашист-влак резервым иктыш чумырен, 14 октябрьыште ик полк наре пехотыжо шагатат пеле артиллерий ден миномет-влак лўйкалыме деч вара самолет-влакым кучылтын, Фонарь курык ден 514,2 кўкшака воктечын виян наступленийым Хатыпс, Фанагорийское, Большое озеро, Котх хребет велке тўналыт. Нунын ваштареш 395 стрелковый дивизийын да 76 стрелковый бригадын салтакше-влак талын кредалыныт.

Тушманын наступленийым шогалташ манын, красноармеец-влак контратакышке кыненыт да илаш-колаш кредалыныт, тушманым ик жаплан шогалтеныт. Кугу польшышым артиллерий пуэн.

14-17 октябрьыште 1195 гап Фанагорийское села воктене тушманын пехотыжым шалатен колтен, Безымянный хутор воктене артбатарейым пытарен, Старообрядческий воктене 105 мм артбатарейым да минометым пудештарен, Фонарь курыкышто икмыняр тўшка салтакым вес тўняшке колтен.

Фашист-влак, нимом ончыде, ончыко каяш тыршеныт да 17 октябрьлан икмыняр кўкшака-влакым налын, Фигурная щель воктеке лектыныт. Вўран кредалмаш деч вара 11-ше контратаке почеш гына Кочканова курыкым налыныт да 620,8 кўкшака могырыш вашкеныт.

Фашист-влак Садовое селашке оборонным шалатен пурен, 18 армийын шентекше лектын кертеныт. Садлан тиде лўдыкшым петыраш манын, пурла флангыш 83 стрелковый бригадым колтат. 1195 гап 76 стрелковый бригадын матросшоваклан польшышым пуаш тўналеш.

20-24 октябрьыште фашист-влакын наступленийыштым шогалташ манын, ятыр гана контратакышке кыненыт да Кочканова курыкым

тушман деч утареныт. 395 стрелковый дивизийын салтакше-влак лўддымылыкым, пентыдылыкым ончыктеныт да фронтын пурла могырыштыжо тушманым чактарен, оборонным шогалтеныт.

Неле условий лийын гынат, артиллерист-влак тушманым кажне кечын кыреныт, тудын техникыжым, салтак-влакышым пытареныт да сенымаш кечым лишемденит. 1195 гап 30 да 395 стрелковый дивизийлан, 76 стрелковый бригадылан полшен шоген. 1 декабрьыште Лысая Гора воктене 2 пулеметный точкым, тушманын пехотыжым шалатен колтен.

28 декабрь 1942 ийыште 56 армий дене кредалше фашист-влак 125 пехотный дивизийым Сталинград воктеке колтеныт, садлан фронтын пурла могырыштыжо тушманын вийже иземын.

Сталинград воктене фашист-влакым авырен да кырен шалатыме деч вара Северный Кавказыште улшо тушманын армийже-влакым, Кавказ мландым утарашлан сай йон лектын. Тидым илышыш пурташ понен 1 январь гыч 8 февраль 1943 ийыште Северо-Кавказский стратегический операций эртаралтеш. Тыште Южный ден Закавказский фронт-влакын армийышт участвоватлат. Тиде стратегический операций жапыште кок наступательный операций эртаралтеш.

1 январь 1943 ийыште Южный фронт Ростов ден Сальск ола-влак могырыш наступленийым тўналеш да кок арня жапыште 150-200 ментым кредалмаш дене эрта. Кок арня вўран кредалмаш-влак каен шогеныт. Немгы командований 1 танковый армийым шентек лукташ тўналын да Ставрополь ола могырыш чакнен. Северо-Кавказский фронтын Северный группыжо тушманым покташ тўналеш, 10-11 январьыште икмыняр ола-влакым налаш, но тушманым авырен огеш керт.

1943 ийыште 1195 гап 56 армийже 72 менте кужытан фронтышто оборонным кучен. 4 январьыште пале лийын: кугу наступлений тўналаш. 56 армий фашист-влакын оборонным шалатен, Краснодар олам налын, Тихорецкая велыш ончыко кайышаш улмаш. 15 январьыште кугу наступленийлан ямдылалташ тўналыт. 56 армийын частыше-влакым комплектоватлат да кугу вийым фронтын да РГК резервше гыч пуат.

16 январь 1943 ийыште тале артиллерийский лўйкалымаш да самолет-влакын бомбитлыме деч вара Закавказский фронтын Черноморский группыжо наступленийыш тарвана. Тўн рольым 56 армийлан ўшанен пуэныт.

1195 гап Пятигорск, Хребтовое воктене оборонным кучен да тушманын оборонным артиллерийын тулжо да изи отряд-влакын атаке-влакше дене шалатылын. Тушман тиде участке гыч ик салтакымат вес верч колтен огыл.

В.Мартъянов.  
Умбагыже лиеш.